



NEWSLETTER

OLIMPIJSKOG KOMITETA BIH



No. 33, novembar/decembar 2025



Poštovane sportistkinje i sportisti,
poštovani prijatelji,

Iza nas je godina u kojoj su naši sportisti, snagom talenta, rada i karaktera, nosili boje Bosne i Hercegovine širom svijeta. Oni su srce olimpijskog pokreta i njegovi najistinitiji ambasadori, dokaz da se kroz sport žive vrijednosti izvrsnosti, prijateljstva i poštovanja.

Olimpijski komitet Bosne i Hercegovine ostaje posvećen stvaranju uslova u kojima sportisti mogu rasti, takmičiti se i dostojanstveno predstavljati svoju zemlju, vođeni olimpijskim idealima i snagom zajedništva.

Ulazeći u Novu godinu, svima vama želim zdravlje, snagu i uspjeh, na sportskim borilištima i izvan njih. Neka 2026. godina bude godina novih snova, čistog nadmetanja i zajedničkih pobjeda.

„Sport ima moć da promijeni svijet, jer govori jezikom koji svi razumiju.“

S poštovanjem,

Akademik prof. dr. Izet Rađo
Predsjednik Olimpijskog komiteta Bosne i Hercegovine

NOVOGODIŠNJA ČESTITKA OLIMPIJSKOG KOMITETA BIH

Dragi prijatelji,

Olimpijski komitet Bosne i Hercegovine, želi vam sretnu i uspješnu predstojeću godinu!

Neka 2026. godina donese prosperitet, zdravlje i nove uspjehe. Zajedno nastavimo promicati sport i olimpijske vrijednosti, te stvarati bolju budućnost za sve.

Sretna Nova godina!

S poštovanjem,



Akad. prof. dr. Izet Rado
Predsjednik



Davor Komšić
Potpredsjednik



Mico Zeljković
Potpredsjednik



POKLON KOJI SE DOBIJA JEDNOM U ŽIVOTU: ZIMSKE OLIMPIJSKE IGRE DOLAZE U ITALIJU!

Odbrojanje je počelo!

6. februara 2026. godine, Zimske olimpijske igre će se otvoriti spektakularnom ceremonijom na Olimpijskom stadionu Milano San Siro — i ove praznične sezone možete pokloniti (ili primiti) zaista jedinstven poklon: olimpijsku kartu!

Svake srijede, nove karte se objavljuju, dajući vam priliku da osigurate svoje mjesto za nezaboravno iskustvo usred nekih od najljepših zimskih pejzaža na svijetu.

Ne propustite priliku da budete dio ovog istorijskog trenutka, jer Italija ponovo nakon 20 godina domaćin je Zimskih olimpijskih igara!

Nabavite svoje karte odmah! ([LINK](#))

Ako ste zainteresovani za kupovinu all-inclusive paketa koji uključuju karte, smještaj i ugostiteljstvo, onda posjetite Olympic Hospitality link dostupan [ovdje](#).



XIV IZBOR SPORTISTE GODINE U ORGANIZACIJI OLIMPIJSKOG KOMITETA BOSNE I HERCEGOVINE

Za sportistu 2025. godine, ponovo je proglašena naša najbolja plivačica Lana Pudar!



U svečanom ambijentu multimedijalne sale Olimpijskog komiteta BiH i uz direktan TV prenos na FACE TV, 09.12.2025. godine održana je 14. po redu manifestacija "Izbor sportiste godine" u organizaciji Olimpijskog komiteta Bosne i Hercegovine i uz specijalno pokroviteljstvo Predsjedništva Bosne i Hercegovine. Izbor sportiste 2025. godine održan je u prisustvu najjavnijih lica bosanskohercegovačkog sporta i sportske javnosti.

Za sportistu 2025. godine, proglašena je naša najbolja plivačica Lana Pudar.

"Velika mi je čast i zadovoljstvo što sam i ovu godinu izabrana za najbolju sportistkinju Bosne i Hercegovine", kazala je naša najbolja plivačica Lana Pudar.

"Ova nagrada će mi sigurno biti značajna motivacija u daljnjem radu. Ovdje na Univerzitetu Virdžinija, vrijedno radim i treniram i predstavljam svoju zemlju sa ponosom. Trudim se da i u narednom periodu donesem mnogo rezultata koji će nas obradovati kao i u prethodnom periodu. Hvala Vam na podršci i povjerenju i na tome što zajedno gradimo bolju i ljepšu budućnost bosanskohercegovačkog sporta."

U ime Olimpijske porodice Bosne i Hercegovine prisutnima se obratio Predsjednik OK BiH, akademik prof. dr Izet Rađo.

"Danas smo ovdje da proslavimo sport, ali i da proslavimo vrijednosti koje sport nosi: odgovornost, posvećenost, hrabrost i zajedništvo. To su vrijednosti koje ne pripadaju samo stadionima i dvoranama, to su vrijednosti koje oblikuju društvo. OK BiH je mjesto gdje se piše drugačija priča, priča o boljem, plemenitijem sutra, gdje svaki sportista, trener i građanin Bosne i Hercegovine postaje partner u stvaranju humanije budućnosti. To je naša obaveza, naša čast i naš put."

“Vi ste dokazali da mala zemlja postaje velika kroz velike ljude. I zato večeras kažem jasno i glasno: ponosni smo na svakog od vas. Ali, kao Predsjednik Olimpijskog komiteta, dužnost mi je reći i ono što se ponekad prešuti: naši sportisti uspijevaju zahvaljujući sebi, a ne zahvaljujući sistemu. To se mora promijeniti. Država koja želi napredak mora imati strategiju, stabilno finansiranje, infrastrukturu, medicinski nadzor, programe podrške, stručne timove i jasna pravila i kriterije. Zapamtite: medalja ne svijetli samo na prsima, ona svijetli u očima ljudi koje ste inspirisali, godinama kasnije. Budite ponosni na sebe. Budite hrabri. Budite glasnici zemlje koja vas treba, možda više nego što mislite. Neka ova noć bude potvrda da smo na pravom putu. Neka bude poziv da država i institucije konačno stanu uz one koji nas predstavljaju s ponosom. I neka bude obećanje da ćemo graditi sportsku kulturu koja našoj djeci daje šansu da ostvare svoje snove.”

Listu dobitnika u svim kategorijama pogledate na [OVOM LINKU](#).





ODRŽAN 2. FORUM SPORTISTA OK BiH



Olimpijski komitet Bosne i Hercegovine, u saradnji sa Međunarodnim olimpijskim komitetom (MOK), organizovao je 2. Forum sportista OK BiH, koji se održao 26. novembra. Ovaj događaj okupio je bivše, sadašnje i buduće vrhunske sportiste iz BiH, pružajući izvanrednu priliku za razmjenu iskustava, informacija i ideja među sportistima i sportskim radnicima.

U saradnji sa kolegama iz MOK-a, koncipiran je edukativni program koji obuhvata predavanja iz oblasti od posebnog značaja za sportiste, među kojima su MOK platforma Athlete 365, AI alati, genetski potencijali, trenažni proces kao i druge aktuelne teme. "Forum sportista je izuzetan događaj koji na jednom mjestu okuplja bh. sportiste i nudi im priliku da steknu nova znanja te razgovaraju o temama koje su od najveće važnosti u ovom trenutku. Program foruma je dizajniran da osnaži, motiviše i ujedini sportsku zajednicu u Bosni i Hercegovini, istovremeno pružajući resurse za poboljšanje performansi sportista. Cilj Forumu je da okupljene sportiste učini jačim i solidarnijim, kako bi zajedno zastupali svoje interese i zalagali se za neophodne promjene," izjavio je Amel Tuka, predsjednik Komisije sportista OK BiH, tokom svog uvodnog obraćanja.

Kompletnu vijest pročitajte [OVDJE](#).

NAPREDNI KURSEVI MENADŽMENTA U SPORTU ASMC 2025



Napredni kursevi menadžmenta u sportu (Advanced Sport Management Courses –skr. ASMC), kompleksni edukativni program osmišljen od strane Međunarodnog olimpijskog komiteta, koncipiran kao kvalitetna teoretska-praktična platforma za unapređenje rada sportskih organizacija, završen je u oktobru mjesecu svečanom dodjelom diploma polaznicima kursa.

Kurs je uspješno završilo 15 predstavnika sportskih saveza BiH, koji su tokom 7 modula imali priliku slušati vrhunske predavače te učestvovati u zajedničkim i individualnim radionicama stičući neophodna znanja i alate za unaprjeđenje rada u sportskom sistemu. Nakon finalnih prezentacija diplome polaznicima su svečano uručene tokom manifestacije Izbor sportiste godine 2025. u organizaciji Olimpijskog komiteta Bosne i Hercegovine.

Ovaj kompleksni edukativni program trajao je od marta do oktobra 2025. godine i obuhvatao je:

- Uređenje olimpijskih sportskih organizacija
- Strateško upravljanje
- Upravljanje ljudskim resursima
- Finansije
- Marketing
- Organizaciju sportskih događaja
- Finalne prezentacije polaznika - studije slučaja njihovih organizacija

Prestizna diploma Međunarodnog olimpijskog komiteta vrijedan je dokaz o kompetencijama za rad u sportskom sektoru širom svijeta.

PREDSJEDNIK OK BIH AKAD. IZET RAĐO UČESTVOVAO NA KONFERENCIJI PR, MEDIA & SPORT DAYS „SPORT KAO JEZIK POVJERENJA I ZAJEDNIŠTVA“



Završnog dana konferencije, program je započeo predavanjem akademika prof. dr. Izeta Rađe, predsjednika Olimpijskog komiteta Bosne i Hercegovine, na temu Sport kao univerzalni jezik: interkulturalna misija Olimpijskog komiteta BiH. Govoreći o ulozi olimpizma, naglasio je da sport nije samo rezultat, nego ideja koja povezuje ljude i gradi povjerenje.

„Jeziku sporta ne treba prevoditelj. Na terenu ne postoje podjele, nego napor, znoj, ruka ruci i osmijeh“, istaknuo je Rađo, dodajući da Bosna i Hercegovina ima „olimpijsko nasljeđe na koje drugi mogu zavidjeti, jer ga nismo dobili da stoji, nego da se nadograđuje“.

Zaključno s izlaganjem, pozvao je na zajedničku viziju, istaknuvši da Bosna i Hercegovina kroz sport i olimpizam treba nastaviti „govoriti jezikom svjetla, mira i prijateljstva“, jer je upravo sport jedan od rijetkih prostora u kojem se može graditi povjerenje iznad podjela.

Nakon izlaganja prof. dr. Izeta Rađe, programski fokus ostao je na ulozi sporta u međunarodnoj komunikaciji, a održana je Panel diskusija “Sport kao univerzalni jezik: interkulturalna komunikacija u pokretu” koji je okupio predstavnike olimpijskog, nogometnog, atletskog i međunarodnog sportskog sektora. Sudionici su bili prof. dr. Izet Rađo (Olimpijski komitet BiH), Igor Štimac (HŠK Zrinjski), Amel Tuka (atletičar), Davor Radić (FIFA) i doc. dr. sc. Said Fazlagić (Olimpijski komitet BiH), a moderirao ga je mr. sc. Ivan E. Tomić. Nakon stručnih izlaganja posle panel diskusije dodjeljene su plakete istaknutim pojedincima, a Konferencija je zaključena završnom riječi i usvajanjem Deklaracije. Više na [ovom linku](#).

U POSJETI PREMIJERU KANTONA SARAJEVO!



Predsjednik Olimpijskog komiteta BiH, akademik prof. dr. Izet Rađo, i predsjednik Biciklističkog saveza BiH, Toni Zorić, sastali su se s premijerom Kantona Sarajevo, Nihadom Ukom. Povod sastanka je bio razgovor o međunarodnoj biciklističkoj utrci "Tour of Bosnia and Herzegovina", događaju koji će našu zemlju postaviti na kartu velikih svjetskih biciklističkih natjecanja, a Sarajevo će biti startna pozicija ove utrke. Takođe je razgovarano i o razvoju vrhunskog sporta u Kantonu Sarajevo.

PREDSTAVNICI KOMISIJE OLIMPIJACA UČESTVOVALI NA FORUMU SPORTISTA I GENERALNOJ SKUPŠTINI SPORTISTE EVROPE



U novembru mjesecu, predstavnici Komisije olimpijaca, predsjednik Amel Tuka i član Mesud Pezer, učestvovali su na osmom izdanju Foruma sportista Evrope i Generalnoj skupštini sportista Evrope u Londonu. Forum je okupio predstavnike komisija 49 evropskih NOK-ova kako bi razgovarali o izazovima i prilikama s kojima se suočavaju sportisti cijelog kontinenta, osiguravajući da oni ostanu u središtu svih odluka unutar EOK-a. Događaji ove vrste pored edukativnog karaktera rade i na izgradnji veza i razumijevanja među sportistima i ostalim interesnim stranama, što je fundamentalni dio olimpijskog pokreta. Naši proslavljeni olimpijci

su iskoristili priliku da se upoznaju sa savremenim kretanjima i potencijalnim rizicima razvoja sporta na globalnom nivou.

OK BIH OBRADOVAO NAJMLAĐE NOVOGODIŠNJIM PAKETIĆIMA U JAJCU, GRADIŠCI I BILJEŠEVU

Olimpijski komitet Bosne i Hercegovine nastavlja svoju plemenitu misiju. Obradovali smo mališane novogodišnjim paketićima u tri bh. grada. Podijeljeno je ukupno 150 paketića. Prva dodjela paketića održana je u Jajcu, gdje su mališani vrtića „Bare“ i udruženja Kapljica rasta „Vodopad Ljubavi“ uz ugodno druženje primili novogodišnje paketiće. Zatim smo otišli u Gradišku gdje nas je dočekala mlada i perspektivna teniserka Tea Kovačević. Zajedno smo uručili prigodne poklone šticienicima Udruženja „Duga“ i školarcima osnovnih škola „Vasa Čubrilović“ i „Kozarska djeca“. Za posljednje ovogodišnje odredište izabrali smo Osnovnu školu Ahmed Muratbegović - područna škola Bilješevo. Uz veselo druženje sa djecom, paketiće je uručio dvostruki olimpijac i predsjednik Komisije olimpijaca OK BiH Amel Tuka. Olimpijski komitet Bosne i Hercegovine izražava ponos i zadovoljstvo što uveseljava najmlađe. Nastavićemo s dodjelom novogodišnjih paketića i narednih godina, uvjereni da je dječija sreća i osmijeh najveća nagrada koju mogu dobiti.



SPORTSKI SAVEZI **BOSNE I HERCEGOVINE**

RAGBI SAVEZ BIH | U18 REPREZENTACIJA BOSNE I HERCEGOVINE ODIGRALA PRIJATELJSKI SUSRET SA U18 SELEKCIJOM SLOVENIJE



Nakon dužeg perioda U18 reprezentacija Bosne i Hercegovine u ragbiju XV odigrala je prijateljski susret sa U18 selekcijom Slovenije, 16.11.2025. godine na stadionu Kamberovića polje pred 100 gledalaca. Rezultat utakmice Bosna i Hercegovina – Slovenija je bio 20:0 (HT 13:0).

Prijateljska utakmica između ove dvije selekcije predstavlja suradnju i planiranje Stručnog štaba Ragbi saveza Bosne i Hercegovine i Slovenije sa ciljem razvoja mladih ragbijaša i priprema za igranje i nastup na Europskim takmičenjima. Iako mlade, obje ekipe pokazale su zavidno znanje ragbija i odigrale jednu fer i korektnu utakmicu u kojoj je domaća publika uživala.

Ovo je bila sjajna uvertira za susrete koji su planirani na proljeće sa selekcijama Hrvatske, Srbije i Bugarske.



UČEŠĆE NA 107. SKUPŠTINI RUGBY EUROPE



U periodu od 05. do 06. 12. 2025. godine održana je 107. Skupština Rugby Europe (Alicante, Španija) kojoj su prisustvovala sve članice sa područja Europe. Ispred Ragbi saveza Bosne i Hercegovine prisustvovali su predsjednik mr sc. Edis Šaćirović i potpredsjednik doc. dr sc. Mirza Oruč. Dnevni red Skupštine uključivao je prezentaciju izvještaja komiteta Rugby Europe, finansijski izvještaj



i planiranje za sljedeću sezonu. Održana je diskusija o strateškom planiranju i unapređenju takmičenja. Dodijeljene su nagrade zaslužnim članovima, te je održana interaktivna radionica o ženskom ragbiju u Europi. Skupština je primila dva nova člana: Ragbi savez Grčke i Ragbi savez Gibraltara. Suradnja regionalnih ragbi saveza (BiH, Srbija, Slovenija, Hrvatska, Crna Gora) prikazana je kao pozitivan primjer, a predstavljen je Kids Rugby Festival kao generator saradnje. Razvoj ženskog ragbija u BiH je ocijenjen veoma visokom ocjenom.

PRVI ŽENSKI TRENER SA L2 LICENCOM ZA RAGBI 7 U RAGBI SAVEZU BIH



“U sklopu jačanja kadrova unutar Ragbi saveza Bosne i Hercegovine sa ponosom objavljujemo da je naša Mihaela Jurić uspješno završila edukaciju, staž i ispitne zadatke koji su neophodni za ispunjavanje uvjeta za dobijanje licence level 2 po propozicijama World Rugby u oblasti ragbija 7.

Od srca čestitamo našoj Mihaeli te pokazujemo da Ragbi savez Bosne i Hercegovine radi na jačanju kadrova i edukaciji sa ciljem jačanja ragbi sporta”, saopštili su iz Ragbi saveza Bosne i Hercegovine.

GIMNASTIČKI SAVEZ BIH | DRŽAVNO PRVENSTVO



U organizaciji Gimnastičkog saveza Bosne i Hercegovine održano je Državno prvenstvo u sportskoj i ritmičkoj gimnastici za 2025. godinu. Državno prvenstvo u ritmičkoj gimnastici je održano u SKPC Mejdan u Tuzli 6. i 7. decembra, a tehnički organizator bio je Klub ritmičko sportske gimnastike "Sloboda" Tuzla. Na Prvenstvu je učestvovalo 167 gimnastičara/ki koji su se takmičili u svim uzrasnim kategorijama od pionira do seniora. Državno prvenstvo u sportskoj gimnastici je održano u Doboju 21. decembra gdje je tehnički organizator bio gimnastički klub "Sparta" Doboj. Na Prvenstvu je učestvovalo 171 gimnastičar/ka koji su se takmučili u svim uzrasnim kategorijama od pionira do seniora.

"Sjajna atmosfera i dosta vrhunskih nastupa, emocija i sportskih trenutaka su obilježili ova dva Državna prvenstva. Gimnastički savez BiH se iskreno zahvaljuje svim klubovima ritmičke i sportske gimnastike na učešću na Državnom prvenstvu 2025", istakli su Saveza.



CHEERLEADING SAVEZ BIH | BOŽIĆNI CHEERLEADING IZAZOV



U Gradskoj sportskoj dvorani u Ljubuškom održan je tradicionalni Božićni cheerleading izazov. Prijašnjih godina natjecanje se održavalo u Kulturnom centru, ali zbog velikog broja gledatelja, postao je premal za ovakav događaj, te je na prijedlog Grada Ljubuškog isti prebačen u Gradsku sportsku dvoranu. Ujedno Grad Ljubuški je i pokrovitelj događaja, a sam događaj je uključen i u program Adventa u Ljubuškom. Na natjecanju je sudjelovalo preko stotinu sportašica iz Županije Zapadnohercegovačke. U kadetskom uzrastu konačni rezultat bio je:

1. mjesto Hrvatski cheerleading klub Široki
2. mjesto Sportski cheerleading klub Ljubuški 1
3. mjesto Sportski cheerleading klub Ljubuški 2

U juniorskom uzrastu konačni rezultat bio je:

1. mjesto Cheerleading klub Ledinac
2. mjesto Hrvatski cheerleading klub Široki
3. mjesto Hrvatski cheerleading klub Široki

Uz natjecateljski dio publika je uživala i u revijalnim nastupima. Svi sudionici su nagrađeni prigodnim darom za Božić. Održana je i dječja tombola, a sav prihod od iste ide za rad Sportskog cheerleading kluba Ljubuški.



BH • TEAM

NOGOMETNA/FUDBALSKA REPREZENTACIJA BIH IZBORILA BARAŽ U KVALIFIKACIJAMA ZA SVJETSKO PRVENSTVO



U poslednjem kolu kvalifikacija za Svjetsko prvenstvo 2026 reprezentacija Bosne i Hercegovine remizirala je sa Austrijom 1:1 na stadionu „Ernst Happel“ u Beču. Ovim rezultatom, Austrija je izborila direktan plasman na Mundijal naredne godine, a našoj selekciji, koja je prethodno pobijedila selekciju Rumunije rezultatom 3:1, predstoji baraž u martu 2026. godine. Ponosni smo na naše Zmajeve na sve što su uradili u ovim kvalifikacijama i želimo im puno sreće u baražu!

ADA AVDAGIĆ I BENJAMIN HUSIĆ OSVOJILI SVJETSKJE BRONZE



Taekwondo reprezentativci Bosne i Hercegovine, Benjamin Husić i Ada Avdagić, ispisali su historiju osvojivši bronzane medalje na Svjetskom prvenstvu U21 u Nairobiju.

Ovo su prve svjetske medalje u historiji bh. taekwondoa i rezultat vrijedan divljenja!

Benjamin Husić (–74 kg) nakon uvodnog bye-a savladao je grčkog Barkofa (2:0) i Kamerunca Abongnija (2:0).

Ada Avdagić (–53 kg) bila je bolja od Koreanke Kim (2:0) i Bugarke Karabeleve (2:0), čime je osigurala plasman među četiri najbolje na svijetu.

Čestitke!

ANUR MEHIĆ DVOSTRUKI POBJEDNIK JUNIORSKIH SLALOM UTRKA



U novembru u švicarskom St. Moritz-u održane su prve NJR slalom utrke u sezoni 2025/26 u kategoriji juniora do 21 godine. Već na samom startu sezone šesnaestogodišnji Anur Mehić ostvario je dvostruku pobjedu u konkurenciji od 90 takmičara, čime je potvrdio izvanrednu formu.

Iako juniorske trke rijetko privlače veću pažnju javnosti, Anurov uspjeh je istakao zastavu Bosne i Hercegovine ispred Švicarske i Italije, najjačih svjetskih skijaških reprezentacija. Podsjetimo, Anur je u prošloj sezoni ostvario više od deset zlatnih medalja na najznačajnijim svjetskim takmičenjima u kategoriji kadeta (U16), čime je najavio uspješan prelazak u juniorsku konkurenciju.

Iz trenerskog tima ističu: “Anur je mladi takmičar koji je tek ušao u kategoriju juniora, a ovim pobjedama pokazao je da se može nositi i s najjačim svjetskim takmičarima u juniorskoj konkurenciji. Iako već sada ima mogućnost nastupa i u seniorskoj konkurenciji, odluka tima je da će u naredne dvije godine primarno nastupati u kategoriji juniora, kako bi nastavio razvoj tehnike, fizičke pripreme i iskustva. Važno je da ne preskačemo korake – cilj je razvoj stabilnog i kompletnog takmičara koji će u narednih nekoliko godina biti spreman za najveće rezultate u seniorskoj konkurenciji.”

ZLATO ZA NEDIMA MUZAFEROVIĆA

Juniorski reprezentativac Bosne i Hercegovine u brzom klizanju (Short Track), Nedim Muzaferović, član KKK Bosna, na međunarodnom takmičenju održanom u Oberstdorfu (Njemačka) osvojio je zlato.

U konkurenciji 60 brzoklizača iz više zemalja, Nedim je u kategoriji Junior A, na 500 metara, osvojio 1. mjesto.

Uz to, ispunio je ISU i SKS BiH normu za nastup na Svjetskom juniorskom prvenstvu, koje se održava 29.1 – 1.2.2026. godine u Salt Lake City (SAD).



EVROPSKI GRAND PRIX | TAEKWONDOISTI BIH OSVOJILI 4 BRONZE



Ceremonijom dodjele medalja okončan je ovogodišnji Evropskom Grand Prix kojem je domaćin bio glavni grad naše zemlje.

Prestižno takmičenje završeno je proglašenjem najboljih pojedinaca, a na pobjednički podijum ponovo se popelo dvoje bosanskohercegovačkih taekwondoista - Lucija Miličević i Adin Hodžić. Predstavnici Bosne i Hercegovine u kategorijama -68 kg i -73 kg osvojili su bronzane medalje, te su se tako pridružili Ejli Makaš i Zlatku Hrnjiću, koji su se prethodno okitili medaljama istog sjaja. Ove godine po prvi put su dodijeljene novačne nagrade za one najbolje u juniorskoj, ali i u kadetskoj konkurenciji.

BOSNIA OPEN 2025 EI | 19 MEDALJA ZA BH. TAEKWONDOISTE

Dvodnevni međunarodni taekwondo turnir Bosnia and Herzegovina Open 2025 održan je početkom decembra uz odlične nastupe predstavnika Bosne i Hercegovine.

Nakon što su se prvog takmičarskog dana bh. seniorke okitile s pet medalja (zlato, dva srebra i dvije bronz), takmičari kadetskog i juniorskog uzrasta osvojili pet zlatnih, šest srebrenih i osam bronzanih medalja.



U ukupnom plasmanu, zbiru seniorskih, juniorskih i kadetskih rezultata, prvo mjesto je zauzeo TKD Marjan (Hrvatska). Druga pozicija pripala je turskoj ekipi Goztepe Spor Klubu, dok je ekipa TKD Novi Grad Sarajevo takmičenje završila na visokoj trećoj poziciji.

Takmičenje je svečano otvorio ambassador Republike Koreje u Hrvatskoj Nj. E. Lee Seungbuhm, koji je svojim obraćanjem samo potvrdio već dokazano prijateljstvo Republike Koreja i bosanskohercegovačkog taekwonda.

Tokom takmičenja dodijeljene su i posebne zahvalnice i priznanja.

NAJBOLJI USPJEH BIH DIZANJA TEGOVA IKAD



Andranik Karapetyan, stipendista Olimpijskog komiteta Bosne i Hercegovine, osvojio je tri zlatne medalje u kategoriji 88 kg na Balkanskom prvenstvu u Durešu, Albanija! Uz to, oborio je balkanski rekord u trzaju, podigavši fantastičnih 168 kg!

Na ovom takmičenju su nastupili i Zerin Kobilić, koji je osvojio 3 bronzane medalje, u trzaju, izbačaju i biatlonu, te Sarah Durak i Faris Durak, osvojivši 6 četvrtih mjesta, a Melina Basimamović 3 peta mjesta.

Ukupan score: 3 zlata, 3 bronzne, 6 četvrtih mjesta, 3 peta mjesta, 7 BiH seniorskih rekorda i 1 balkanski rekord.

SVJETSKI KUP DORDRECHT | TARIK OMERAGIĆ



Najbolji bosanskohercegovački brzoklizač Tarik Omeragić, uz podršku Saveza klizačkih sportova BiH, Olimpijskog komiteta BiH i BH Telecoma, nastupio je od 27. do 30. novembra u Dordrehtu (Nizozemska) na četvrtom, ujedno i posljednjem Svjetskom kupu koji se bodovao za plasman na ZOI Milano–Cortina 2026.

Tarik je u konkurenciji 92 najbolja svjetska brzoklizača ostvario dobar nastup. U disciplini 1500 m zauzeo je 45. mjesto, dok je na 500 m završio kao 50. Nažalost, iako je bio veoma blizu, naš reprezentativac nije uspio izboriti plasman među 36 brzoklizača koji će nastupiti na ZOI 2026.

U nastavku klizačke sezone, Tarik nastavlja s pripremama za Evropsko prvenstvo koje će biti održano u januaru iduće godine u Nizozemskoj, kao i za Svjetsko prvenstvo u martu 2026. u Kanadi.

EVROPSKO PRVENSTVO U MALIM BAZENIMA

Poljski grad Lublin ugostio je najbolje evropske plivače tokom Evropskog prvenstva u malim bazenima u periodu od 02. do 07. decembra. Na Prvenstvu je nastupilo i 6 reprezentativaca Bosne i Hercegovine. Boje naše zemlje branili su: Iman Avdić, Adi Mešetović, Alan Jović, Kenan Dračić, Sergej Trbojević i Arian Kadić, uz najmlađeg člana reprezentacije Vanju Kvočku.



“Postignuti rezultati su u skladu s očekivanjima, a posebno smo ponosni na Iman Avdić, koja je na ovom Prvenstvu postavila novi seniorski rekord Bosne i Hercegovine u disciplini 400 m slobodno te zauzela 25. mjesto”, saopštili su iz Plivačkog saveza Bosne i Hercegovine.

NOVI REKORD ESME DIZIĆ



Na posljednjem međunarodnom plivačkom mitingu “Zmaj” u organizaciji PK “Novi Sad”, Esma Dizić ponovo je oborila rekord Lane Pudar u mlađekadetskoj kategoriji (djevojčice do 10 godina) u disciplini 50 m delfin – ovaj put na 25 m bazenu! Novo vrijeme: 32.22 (prijašnji rekord: 32.51). Ovim rezultatom Esma je kompletirala dionicu 50 m delfin i trenutno je vlasnica rekorda i na malim i na velikim bazenima.

KENAN DRAČIĆ POSTAVIO NOVI APSOLUTNI REKORD BIH

Plivač Kenan Dračić (PK Sport Time Sarajevo) ispisao je historiju! Na 200 m slobodno isplivao je 1:43.97 i osvojio 853 WA boda — rezultat ravan finalu Evropskog seniorskog prvenstva. Rezultat je postignut na međunarodnom plivačkom mitingu Mladost 2025 u Zagrebu, u sklopu zvaničnog kalendara European Aquatics.



Ovaj rezultat potvrđuje izuzetan napredak našeg reprezentativca i ogroman potencijal bh. plivanja na međunarodnoj sceni.

SEDAM MEDALJA U SENIORSKOJ I MASTERS KONKURENCIJI NA SVJETSKOM KIK BOKS PRVENSTVU



Reprezentacija Bosne i Hercegovine osvojila je ukupno 7 medalja u seniorskoj i masters konkurenciji i dvije medalje u konkurenciji veterana na Svjetskom prvenstvu u kik boksu koje se održalo u prijestonici Ujedinjenih Arapskih Emirata, Abu Dabiju. Na jednom od najzahtjevnijih dosadašnjih svjetskih prvenstava za seniore i masters, koje se održavalo u Abu Dabiju od 21. do 30. novembra 2025. godine, naša reprezentacija je sa 28 takmičara i takmičarki od 1956 učesnika iz 89 država uspjela osvojiti 7 medalja, od toga 5 seniorskih i 2 medalje iz kategorije masters.

Srebrne medalje osvojili su:

1. Dragana Maksimović – disciplina Low Kick u kategoriji -70 kg
2. Adnan Redžović – disciplina Kick Light u kategoriji +94 kg veterana/masters

Bronzane medalje osvojili su:

1. Jasmina Merdić – disciplina Low Kick u kategoriji +70 kg
2. Alija Tucak – disciplina K1 u kategoriji +91 kg
3. Edin Sinanović – disciplina Low Kick u kategoriji -75 kg
4. Vedad Čutuk – disciplina Low Kick u kategoriji -67 kg
5. Igor Ranković – disciplina Kick Light u kategoriji -84 kg masters

Kik boks savez je iskazao veliku zahvalnost BH Telecomu i Vladi Federacije BiH na podršci u radu i valorizaciji dosadašnjih rezultata bh. takmičara.

SEJFO ŠEHOVIĆ OSVOJIO ZLATO NA WPA SP U POWERLIFTINGU



Sejfo Šehović osvojio je još jednu zlatnu medalju na WPA (World Powerlifting Alliance) Svjetskom prvenstvu u powerliftingu u Mađarskoj!

Ova prestižna smotra, na kojoj je učestvovalo čak 35 zemalja, prikazala je vrhunsku formu, disciplinu i posvećenost našeg velikog sportaša, višestrukog svjetskog i evropskog prvaka u powerliftingu.

EU PROJEKTI

SAFEGUARDING U SKLOPU 2. FORUMA SPORTISTA



Forum sportista u organizaciji OK BiH u saradnji s Međunarodnim olimpijskim komitetom (MOK) koji je okupio bivše, sadašnje i buduće vrhunske sportiste iz cijele zemlje poslužio je kao platforma za razmjenu znanja, iskustava i ideja, s ciljem jačanja položaja sportista i unapređenja sportskog okruženja u BiH.

Safeguarding officer Olimpijskog komiteta BiH, Ema Habul, održala je predavanje o važnosti zaštite sportista, te o ključnim principima safeguarding-a

i važnosti stvaranja sigurnog, podržavajućeg i dostojanstvenog ambijenta za sve sportiste. Istaknuto je da je prevencija nasilja, zlostavljanja i diskriminacije jedan od prioriteta OK BiH, te da edukacija sportista predstavlja važan korak ka izgradnji zdravijeg i sigurnijeg sportskog sistema.

EVROPSKA SEDMICA SPORTA - DOBITNICI DRUGE NAGRADNE IGRE

Krajem novembra mjeseca izvučeni su dobitnici još jedne nagradne igre OK BiH povodom Evropske sedmice sporta i obilježavanja 10. godišnjice kampanje [#BeActive](#). Dobitnici nagrada su:

1. Bicikl - @mirza.photography
2. Planinarska oprema - @dzejlaciko
3. Jakna - @merima.puric
4. Role - @salolonii

Čestitke dobitnicima i #stayactive!

„Active Together European Week of Sport“ finansira Evropska unija, kroz Erasmus+ sport program, čiji je koordinator Ministarstvo civilnih poslova Bosne i Hercegovine. Evropska sedmica sporta pokrenuta je 2015. godine kao inicijativa Evropske komisije s ciljem borbe protiv fizičke neaktivnosti, a OK BiH kroz niz aktivnosti i događaja aktivno učestvuje u projektu sa ciljem motivacije i podizanja svijesti građana o važnosti fizičkih aktivnosti za sve generacije.

NAGRADNA
IGRA

OLIMPIJSKI KOMITET BIH
I

#BEACTIVE

#BEACTIVE 
EUROPEAN WEEK OF SPORT

23 - 30 September



INTERVJU ELVEDINA MUZAFERIJA

OK BiH: *Olimpijske igre Milano Cortina 2026 se približavaju. Koje su tvoje ambicije i završni plan priprema za Igre i u kojoj disciplini smatraš da imaš najveće šanse za vrhunski rezultat?*

ELVEDINA MUZAFERIJA:

Moja osnovna ambicija je da u Milano Cortini budem potpuno spremna — fizički, tehnički i mentalno. Fokus u završnim pripremama je na kontinuitetu, zdravlju i preciznom tempiranju forme. Brze discipline zahtijevaju puno strpljenja i pametno doziranje opterećenja, tako da je svaki segment plana vrlo detaljno razrađen. Najveće šanse za vrhunski rezultat vidim u super-G-u, jer je to disciplina u kojoj mogu najbolje spojiti brzinu, osjećaj za liniju i taktičko razmišljanje.



OK BiH: *Kao najbolja bh. skijašica, da li danas osjećaš veći pritisak očekivanja ili veće samopouzdanje zahvaljujući iskustvu koje sada imaš?*

EM: Iskreno, danas osjećam više samopouzdanja nego pritiska. Očekivanja uvijek postoje, ali iskustvo koje sam stekla u posljednjim sezonama naučilo me kako da ih pretvorim u motivaciju. Znam šta znači voziti pod pritiskom i kako ostati fokusirana na ono što je pod mojom kontrolom. Taj mir i sigurnost u sebe su nešto što ranije nisam imala u ovoj mjeri.

OK BiH: *Koji ti je rezultat ili trka najdraža i zašto?*

EM: Najdraže su mi one trke u kojima sam znala da sam dala apsolutno sve, bez obzira na konačan plasman. Posebno mjesto imaju utrke u kojima sam pokazala da mogu biti konkurentna najboljima na svijetu, jer su mi one potvrdile da sam na pravom putu i da sav rad ima smisla.

Foto: Facebook Elvedina Muzaferija



OK BiH: *U kojim segmentima svoje vožnje smatraš da si najviše napredovala u protekle dvije sezone?*

EM: Najveći napredak vidim u stabilnosti pri velikim brzinama, čitanju terena i taktičkom pristupu stazi. Takođe, puno sam radila na efikasnijem položaju tijela i boljem upravljanju rizikom — znati kada napasti, a kada sačuvati brzinu, danas mi dolazi mnogo prirodnije.

OK BiH: *Koliko su se promijenili tvoji treninzi i stručni tim u 2025. godini u odnosu na ranije – šta je danas drugačije u pripremi za brze discipline?*

EM: Treninzi su danas znatno individualiziraniji. Više se oslanjamo na analitiku, precizne podatke, regeneraciju i prevenciju povreda. Stručni tim funkcioniše kao cjelina — svako tačno zna svoju ulogu. U pripremi za brze discipline danas se puno više pažnje posvećuje detaljima koji možda nisu vidljivi spolja, ali prave ogromnu razliku na stazi.

OK BiH: *Za kraj, kaži nam koji je tvoj sportski moto i koja je tvoja poruka mladim u Bosni i Hercegovini?*

EM: Moj sportski moto je: “Vjeruj procesu i ostani dosljedan sebi.” Mladima u Bosni i Hercegovini poručujem da sanjaju hrabro i da ne dozvole da ih ograničenja okoline zaustave. Put do cilja nije lak, ali je vrijedan svake žrtve. Ako vjerujete u sebe i spremni ste raditi dugoročno, granice se pomjeraju.

OK BiH: *Hvala Elvedina, želimo ti puno sreće u završnim pripremama i nastupu na tvojim trećim Zimskim olimpijskim igrama Milano Cortina 2026! Svi smo uz tebe!*



ZAVIRITE U DRUŠTVENE MREŽE OK BiH (klikom na sliku)



Ovaj događaj je organizovan uz specijalno pokroviteljstvo Predsjedništva Bosne i Hercegovine i okupio je najeminentnija lica bosanskohercegovačkog sporta kao i sportsku javnost.

Ne propustite priliku da pratite našu ceremoniju online na našem YouTube kanalu! 🎥🌟

#IzborSportiste #Sport2025 #OKBiH #facetv



youtube.com

Ovo je najbolja sportistkinja cijele BiH! Izbor



View insights

Boost post

91


Q

↺

↻

🔖

🔖



Pratite nas na društvenim mrežama:
(klikom na ikone)



©2025. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

